

NAQQIUT NUTAAQ

Siusinnerusukkut naqqiut 4. oktober 2018-imeersoq taarserpaa

Uunga siunnersuut: Kommunit suliffeqarfiutaasa pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna kommunit suliffeqarfiutaasa pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisissaattut siunnersuut saqqummiuppara.

Siullermeerinnineq manna sioqqullugu inatsisissatut siunnersuummut naqqiummik Naalakkersuisut nassiussipput. Siunnersuutip Inatsisartunut saqqummiutinnginnerani pingaartumik kommuninit uparugaat Naalakkersuisunit malinniarneqartut Naqqiummi tassani takuneqarsinnaavoq.

Siunnersuut ullumikkut oqaluuserisarput malillugu suliffeqarfiit kommuninit pigineqartut taarsigassarsinnaatitaassanersut il. il. kommunalbestyrelsinit aalajangigassanngortinneqassaaq. Inatsisissatut siunnersuutaqqaartumut sanilliullugu suliassaq tamanna taamaalilluni Naalakkersuinit kommunalbestyrelsinit nuunneqassaaq.

Taama akuerseriaaseqarnissaq pisortat akiitsuisa, tassungalu ilanngullugu suliffeqarfiit pisortanit pigineqartut akiitsuisa tamat oqartussaaqataanerannik tungaveqartumik nakkutillivigineqarnissaannik pisariaqartitsinermit naapertuulluinnarpoq.

Suliffeqarfiit pisortanit pigineqartut pilertortumik nakkutillivigineqanngitsumillu akiitsoqalernerat nunatsinni aningaasaqarnermut annertuumik sunniuteqarsinnaavoq, allaallu nunatsinni innuttaasunut suliffeqarfinnullu aningaasaqarnikkut kinguneqarsinnaalluni.

Ersarissuuneq tamallu oqartussaaqataanerannik tungaveqarluni nakkutillineq sakkussaapput pitsaasut akiitsunik nakkutilliviginninnissamut siuarsaaqataasinnaasut.

Inatsisartut inatsisissaani matumani siunertarineqartoq tassaavoq suliffeqarfiit kommuninit pigineqartut akiitsortarnerannut il. il. atatillugu kommunalbestyrelsit isummernissamut periarfissaqarnissaasa qulakkeerneqarnissaa, taamaalilluni suliffeqarfiit taakku tamat oqartussaaqataanerannik tunngaveqarluni nakkutilliisarneq ammasuunissarlu nukittorsarlugit.

Suliffeqarfiit kommuninit pigineqartut, kommunit ataasiakkaat ataatsimoorlutilluunniit toqqaannartumik toqqaannangitsumillu aningaasaatit 50 procentiinit amerlanerusunik pigineqataaffigisaat imaluunniit taasisinnaassutsit 50 procentiinit amerlanerusunik pigisaqarfigisaat, kommunalbestyrelsinit akuerineqaqqaarnatik inissianik, atuarfinnik il. il. suliffeqarfiup allamut pisussaaffiitut qularnaveeqqusiissuteqarsinnaannginnissaat taamaalilluni siunnersuutigineqarpoq. Tamanna aamma attartornermi attartugassanngortitsinermillu isumaqatigiissuteqarnermi atuuppoq.

Suliffeqarfik kommunimit pigineqartoq annikinnerpaamik 25 procentimik akiliisinnaassuseqarpat suliffeqarfik kommunimit pigineqartoq allamut akiligassaqalernermigut illutanik, inissianik, aqqusinernik assigisaannillu qularnaveeqqusiisinaanissamut kommunalbestyrelsimit taamaallaat akuerineqarsinnaasoq aamma siunnersuutigineqarpoq.

Taarsigassarsianut il. il. qularnaveeqqusiunneqartunut aningaasartuutit atuisartunit akilerneqartussanngussapput imaluunniit pisortat aningaasartuutaasa appariarnerisigut malitseqaataasumilluunniit isertitanit illuatungilerneqartut minnerpaamik aningaasaliinermut atatillugu aningaasartuutitut naapertuuttut. Taamaattoqanngippat suliffeqarfinit qinnuteqaatit kommunalbestyrelsinit akuerineqarsinnaassanngillat.

Inatsimmit malittarisassat malinneqanngippata pineqaatissiissutissat pillugit malittarisassanik siunnersuut matumani pineqartoq maanna imaqaanngilaq. Taamaattumillu kinguneqaatissiissutissatut aalajangersakkat inatsimmut ilanngunneqarnissaat siunertaralugu aappassaaneerinninnissap pingajussaaneerinninnissallu tungaanut allannguutissatut siunnersuuteqarnissaq pisariaqassanersoq Naalakkersuisunit isumaliutigineqassaaq.

Naggasiullugu inatsisissatut siunnersuut tassungalugu nassuiaatit innersuussutigaaqka.

Taama oqaaseqarlunga Naalakkersuisut sinnerlugit siunnersuut Inatsisartunut oqaluuserisassanngortippara.